

Nos ta resa pa muhé nan por haña e regalo di salbashon

Kiko ta evangelio? Evangelio ta e “bon notisia” di Dios ku “Kristu a muri pa nos pika nan diakuerdo ku skriptura, ku ela wòrdu derá, i a lanta riba e di tres dia for di morto”. (1 Kor. 15:1-4.) E evangelio no ta solamente tokante di Hesu-Kristu. E *ta* e evangelio!

Dikon Kristu a bin na mundu pa muri? Dios a krea Adam, e representante di nos kabes, sin piká. Sin embargo Adam a rechasá Dios su outoridat i a desobedesé. Na e momento ei, piká, morto, sufrimentu i separashon di un Dios santu a drenta mundo- tantu spiritual komo fisiko. Henter kreashon a keda kontaminá, i e naturalesa pekaminoso di e hòmber a kontaminá tur generashon. Hesta un situashon difísil i desesperante!

Den su misericòrdia, Tata a manda su yu divino na mundo, pa nase di un bírgen, pa e tuma un naturalesa humano manera nos. Durante di su bida Hesus a kumpli debidamente ku e leinan ku Adam a desobedesé. Na e momento apuntá, Hesus a karga boluntariamente e ira di Dios – tur e pika nan ku nos a kometé i lo bai kometé, na e krus. E debe aki nos no por paga bèk. Después di tres dia, Dios, pa medio di Spiritu Santu, triunfantemente a lanta Hesus for di morto!

Esaki ta e bon noticia ku pa medio di e sakrifisio di Hesus, nos komo su yunan, a keda rekonsiliá ku Dios. Nos piká nan a keda pordoná, i nos a wòrdu mira komo hustu den e bista di Dios i nos tin e siguransa di un bida eterna den shelu. E salbashon aki ta un trabou di Dios so, un regalo di Dios i no un resultado di nos bon trabou. (Efe. 2:8-9).

Kon nos ta reakshoná riba asina un bon notisia? Nos “ta proklamá ku nos boka ku Hesus ta Señor, i ta kere den nos kurason ku Dios a lant’é for di morto” (Rom. 10:9-10). Komo gradisimentu pa un salbashon asina grandi, simplemente nos ta konta otro nan, “Ela stima mi i a entrega su mes pa ami, un pekadór”.

Resa pa:

- 1 Muhé nan kristian por komprondé ku, ***“Dios a hasi nos loke nos ta: den Kristu Hesus El a krea nos pa hasi bon obra. Asina nos por kana den e kaminda di bon obra, ku Dios a prepará kava pa nos.” (Efe 2:10).***
- 2 Muhé nan por komprondé ku Dios, pa medio di Su kreashon, ta revelá Su bèrdat, ***“For di tempu ku Dios a krea mundo, hende por komprondé klaramente kua ta e karakterístikanan invisibel di Dios, esta ku su poder no tin fin i ku en bèrdat E ta Dios. Hende por mira esaki den loke Dios a krea, p’esei nan no tin diskulpa.” (Rom 1:20).***
- 3 Muhé nan ku ta salbá por realisá ku obediensia na Dios su palabra ta evidensha di nos amor pa Kristu. Hesus emfatikamente a bisa, ***“Si boso ta stima Mi, boso lo warda mi mandamentunan.” (Huan 14:15).***
- 4 Muhé nan kristian por rekonsihá ku, ***“ni e lugá di mas haltu ni esun den di mas profundo, ni niun otro kos ku Dios a krea, no por separá nos nunca di e amor ku Dios a muestra nos den persona di Kristu-Hesus nos Señor.” (Rom 8:39).***
- 5 Muhé nan por yega na, ***“konosé Abo, e úniko Dios verdadero, i konosé Kristu Hesus, Esun ku Abo a manda.” (Huan 17:3).***
- 6 Muhé nan kristian por tin konfiansa ku ***“nan sa ku mi a haña e enkargo pa defendé e bon notisia.” (Fil 1:16).***
- 7 Awe riba dia di salú nos ta gradisí Dios pa tur e instansia nan ku ta hasi algu pa trese mehorashon riba e área di salubridat, spesialmente pa loke ta trata salú di e ser muhé.
- 8 Pa mama nan kristian por siña e palabra di Dios, di moda ku nan por siña nan yunan, ***“e palabranan aki i papia di nan ora boso ta na kas i ora boso ta na kaminda, ora boso ta bai drumi i ora boso lanta. (Deut 11:19).***
- 9 Pa muhé nan por sa ku salbashon ta bin solamente di Kristu: ***“Ami ta e kaminda, bèrdat i vida; niun hende no por yega serka Tata, si no ta pa medio di Mi. (Huan 14:6).***
- 10 Pa programa nan di Muhé di Speransa por guía mihó nan pa haña speransa i sanashon den Kristu-Hesus, ku a ungi nan pa, ***“Spiritu di Señor ta riba Mi, p’esei El a skohe Mi pa anunsiá e bon notisia na pobernan. El a manda Mi proklamá libertat pa prezunan; bista pa siegunan; i esnan oprimí, libertat. Mi mester anunsiá e era di Señor su gracia. (Lukas 4:18-19).***
- 11 Muhé nan kristian por, ***“Stima Señor, bo Dios, di henter bo kurason, ku henter bo alma, ku henter bo mente, i ku tur bo forza. E di dos mandamentu mas importante: Stima bo próhimo manera bo ta stima bo mes. No tin niun otro mandamentu ku ta mas importante ku esakinan. (Marko 12:30-31).***
- 12 Muhé nan no salbá, ku ta pidi pa ***“tal bes Dios por duna e hendenan ei oportunidat di kombertí i yega na un konosementu real di e bèrdat. E ora ei nan por bin bei i skapa di e trampa ku diabel a gara nan aden pa pone nan hasi loke e ke.” (2 Tim 2:25-26).***



- 13 Muhé nan kristian por laga **“boso lampi bria pa otro hende, pa nan mira boso bon obranan i alabá boso Tata den shelu.” (Matea 5:16).**
- 14 Programa nan di muhé di Speransa por enkurashá kreyente nan, pa por guía no kreyente na Kristu, pa proklamá fielmente e evangelio di Kristu-Hesus na tur nashon.
- 15 Muhé nan por deklará, **“Señor, serka ken nos tin ku bai? Abo tin e palabranan k uta duna vida eterno! Nos ta kere i nos a haña sa tambe ku Abo ta e Santu di Dios” (Huan 6:68-69)**
- 16 Tur esposa kristian por laga nan beyesa, **“Sali for di loke boso tin den boso kurason, e bunitesa duradero di un spiritu suave i tranquil. Ta e bunitesa ei ta esun di mas valioso den vista di Dios!” (1 Pedro 3:4).**
- 17 Pa nos tata Dios por kibra e muraya nan spiritual ku ta siega muhé nan no kreyente di moda ku, **“nan no por mira lus di e bon notisia, e bon notisia tokante gloria di kristu ku ta e imagen di Dios.” (2 Kor 4:4).**
- 18 Tim di TWR Muhé di Speransa rondo di mundo tin e favor di Dios riba nan bida i pa Dios, **“Duna firmesa na obra di nos mannan, sí, konfirmá obra di nos mannan.” (Salmo 90:17).**
- 19 Pa esnan ku a risibí Kristu-Hesus e Señor pa, **“biba den unión kunÉ. Sòru pa boso ta ankrá profundamente den djE i laga E ta fundeshi di boso vida. Keda firme den e fe ku a siña boso i laga palabranan di grandisimentu na Dios brota Sali for di boso boka. (Kol 2: 6-7).**
- 20 Pa muhé nan kristian por kompartí ku nan, **“no tin bèrguensa di prediká e bon notisia, pasobra e ta e poder di Dios pa salva tur k uta kere, na promé lugá hudiunan, pero tambe esnan no hudiu. (Rom. 1:16.)**
- 21 Señor por habri wowo nan di muhé nan ku no ta salbá, **“di moda ku nan ta bira lomba pa skuridat i aseptá lus, bira lomba pa poder di Satanas i aseptá Dios. E ora ei lo pordoná nan nan piká i nan lo haña un lugá serka esnan ku ta pertensé na Mi, pa motibu di nan fe den Mi.” (Echonon 26:18).**
- 22 Kristian nan por proklamá ku, **“Pasombra Dios a stima mundo asina tantu ku El a duna su úniko Yu, pa tur esnan ku pone konfiansa den djE no bai pèrdí, ma haña vida eterno” (Huan 3:16)**
- 23 Muhé nan por skucha i rospondé na e palabra di Hesus: **“Tur ku ta kansá i kargá, bini serka Mi i Ami lo duna boso sosiegu.” (Matea 11:28).**
- 24 Awe riba dia di sekretaria, nos ta resa pa tur e muhé nan ku tra, komo sekretaria den tur sektor i departamento na Bonaire, pa Dios bendishoná nan i yena nan ku sabiduría.
- 25 Pa muhé nan ku ta skucha e progama nan di Muhé di Speransa, por partisipá den grupo nan di orashon. Laga nos pidi Dios pa move den nan kurason pa nan por, **“Aseptá ku humildat kompleto e palabra ku Dios a planta den boso kurason i ku por salva boso.” (Hakobo/ Santiago 1:21).**
- 26 Dios por duna muhé nan kurashi pa nan por proklamá e evangelio di Hesu-Kristu. **“Est’un legria mira**

portadó di bon notisia bini riba serunan.” (Isaías 52:7).

27 Pa muhé nan kristian por haña kurashi pa medio di e promesa di Dios. ***“P’esei Kiko mas nos por bisa? Si Dios ta na nos favor, ken por ta contra nos? Ni su mes yu E no a spar, pero a entreg’É na morto pa nos tur.” (Rom 8:31-32).***

28 Dios su pueblo por alab’É pa e pasenshi ku E tin ku nos. ***“pero ta pasenshi E tin ku boso. Señor no ke pa niun hende bai pèrdí. E ke pa tur hende kombertí i sigui su boluntat. (2 Pedro 3:9).***

29 Kristian nan por rekonsihá den e komplitut di e propósito di Dios pa medio di Hes-Kristu. ***“Pasobra a mata Bo i ku bo sanger a kumpra hende liber pa Dios for di kada tribu i idioma, for di kada pueblo i rasa. (Rev. 5:9).***

30 Pa tur hende por komrpondé ku un dia. ***“ Al fin i al kabo nos tur tin ku bai dilanti di Dios pa E huzga nos. Pasombra tin skibí: Ami Dios bibu, ya hura bo ku tur hende lo hinka rudia pa Mi i proklamá públikamente ku ta Ami ta Dios. (Rom. 14:10-11).***